


列女傳

彙編

鄭曉霞 林佳鬱 編

七

北京圖書館出版社



LIE NU ZHUAN HUI BIAN

列女傳彙編

鄭曉霞 林佳鬱 編

7

蘇子知書

廣列女傳卷十四

桐城劉開孟涂纂

烈婦類二

庫庫特穆爾妻

庫庫特穆爾妻毛氏夫從其主徙金山卒于哈刺那海之牙庭

毛自經死

明史稿

僧格實哩妻

西臺御史僧格實哩妻明師克奉元與夫俱投崖死

明史稿

朱春妻

三原縣尹朱春妻城破春謂妻曰吾當以死報國妻曰君能盡

忠妾豈不能盡節俱投繯死

明史稿

楊椿妻

參謀楊椿格鬪罵賊死妻明日圭得其尸撫而哭之亦自經死

明史稿

頌曰元之喪師臣多殉節彼諸女婦矯矯義烈

花雲妻

花雲妻者郃氏之女也賦性剛烈識理道每對雲語及王事則曰報國爲忠語及諸將則曰不妄殺爲良雲重之雲以院判守太平僞漢陳友諒攻其城城中乏食士馬俱憊城遂陷雲乃被執罵賊至死不輟郃時一子甫三週聞雲與賊戰勢危郃抱其兒泣謂家人曰城且破吾夫必死之吾夫死吾必不獨生然不可使花氏無後嬰兒在若等善撫育之聞雲就縛悲慟哽咽以圭死家人止之不及遂赴水死焉

明史

頌曰花雲之妻智識素卓旣延夫後又保己節身沈清波志光

日月

藺氏

藺氏者藺人之女也陳友諒部屬鄧平章陷江西見藺有殊色遂併其嬰兒掠去藺度不得歸乘閒乃先殺其嬰兒齧指血題一律于壁上其詩云涇渭難分濁與清此身不幸厄紅巾孤兒豈忍更他姓烈婦甯甘事二人白刃自揮心似鐵黃泉欲到骨如銀荒邨日落烏啼處過客聞之亦慘神書罷自刎而死友諒聞之哀其死而高其節立廟于城之東北隅大書節婦以旌表之

繡像列女傳

頌曰藺氏之女才而且貞作詩自殺友諒且旌

程徐妻

程徐妻金氏至正中徐以明春秋知名官兵部尙書致仕明兵

入元都金抱二歲兒與女瓊赴井死

明史稿

頌曰夫雖致仕爲元舊臣明兵旣入妻乃殞身

唐方妻

唐方妻丁氏名錦孥浙興昌人洪武中方爲山東僉事坐法死妻子沒爲官婢有司案籍取之監護者見丁色美借梳掠髮丁以梳擲地其人取掠之持還丁丁罵不受謂家人曰此輩無禮必辱我非死無以全節肩輿過陰澤見崖峭水深躍出赴水衣厚不能沈從容以手斂褰隨流而沒年二十八時稱其處爲天人潭

明史

頌曰坐法當配途中恐辱躍身澗流完節以沒

方正學夫人

方正學先生夫人鄭氏先生盡節夫人先自經死二女投秦淮

河死明史稿

黃觀夫人

黃觀夫人翁氏爲燕王所捕并二女給象奴奴索釵釧市酒肴翁佯諾悉與奴持去急攜二女及家屬十人投淮清橋下死觀聞金川門不守嘆曰吾妻有志節必死招魂葬之江上自投羅刹磯死初觀妻投水時歐血石上成小影陰雨則見相傳爲大士像昇至菴中翁夫人見寢曰我黃狀元妻也比明沃之以水影愈明愁慘狀後移置觀祠名翁夫人血影石明史稿

王叔英妻

王叔英妻金氏英聞金川不守書絕命書自經燕王簿錄其家金已自經死二女下錦衣獄赴井死明史稿
頌曰有明三臣操行取烈妻女從難死全大節嗟黃夫人志識

尤絕宜其神靈昭彼日月片石千年血影不滅

王良妻

王良爲浙江按察使燕王篡位遣使召良良集諸司印于私第未卽決妻問故曰吾分應死未知所以處汝耳妻曰君男子乃爲婦人謀耶饋良食食已抱其子入後園置于池旁投水死良斂妻畢以子付所善某僉事家遂積薪自焚印俱沒

明史稿

頌曰大義所在胡爲婦謀激夫引決一語千秋

鄭華妻

東平吏目鄭華妻蕭氏燕王兵至州長貳盡棄城走華謂妻曰吾義不屈柰汝年少蕭泣曰君不負國妾敢負君華曰足矣城

陷俱不屈死

明史稿

頌曰君不負國妾敢負君夫曰足矣遂以節聞

曾鳳韶妻

曾鳳韶妻李氏建文初鳳韶爲監察御史燕王稱帝召不赴刺
血書衣襟自殺妻亦守節死

明史稿

練大亨妻

練大亨官保定知縣聞其叔子甯之變與其妻沈劉家河死

明史稿

陳迪妻

陳迪妻管氏迪盡節蒼頭拾其遺骸歸葬管自縊死

明史稿

頌曰燕兵旣入諸臣死義婦各從夫其事足記

樂鳳妻

樂鳳高郵人知全州守將謝再興叛殺鳳妻王氏以身蔽鳳并

殺之

明史稿

星子有卷三
頌曰守將既叛加害所天以身蔽夫乃并死焉

劉子輔妾

劉子輔知諒江府黎利破城自縊死一子一妾皆從死明史稿

頌曰夫守邊羈破城自縊妾曰從夫雖死曷惜

曹義繼妻李氏

豐潤伯曹義卒繼室李氏殉英宗詔旌之明史稿

吳復妾

安陸侯吳復在普定買妾楊氏年十七復死親斂畢沐浴更衣
自經死封貞烈淑人明史稿

喬宇二妾

吏部尙書喬宇沒二妾劉許皆從死明史稿

頌曰夫歸泉壤不忍獨生願言同穴不渝厥盟

劉士貺母

劉士貺安福人紅巾倡亂將屠其家母張氏度難全率羣女婦

沈焚潭死賊械士貺久得釋

明史稿

頌曰劉母張氏聞亂意決率婦自沈不辱其節

張統妻

吏部尙書張統爲觸成祖怒統懼自經于後堂妻子相率投池

水死

明史稿

頌曰傷夫冤死死有餘悲何以洩憤地下爲期

王化妻

平遠知縣王化寄妻子會昌身率鄉兵往擊賊賊連敗乃縱反

閒會昌言化已沒妻計氏痛哭自刎化怒追賊益急獲賊首于

石子嶺計氏被旌官爲立祠

明史稿

卷之四
五
頌曰王化之妻以閒自殺夫爲復仇置賊于法

石星妻

吏科給事中石星上疏觸帝怒廷杖六十其妻鄭氏誤聞星已死遽觸柱死聞者哀之

明史稿

頌曰誤傳夫死一慟殞身烈哉貞性感傷行人

葛通甫妻

葛通甫妻馬月娥西域人元武昌尹職馬祿丁女也少聰慧聽諸兄誦說經史輒通大義長適蕪湖葛通甫事上撫下一秉禮法長姒盧率諸婦女悉受其教太祖渡江之六年僞漢兵自上游而下盧曰太平有城郭且嚴兵守可恃使月娥挾諸婦女往避之未幾寇至城陷月娥嘆曰吾生詩禮家可失節于賊耶抱幼女赴死諸婦女相從投水者九人方盛暑尸七日不腐顏

色如生鄉人爲巨穴合葬之故居之南題曰十女墓娥弟丁鶴
年幼通經史皆娥口授也後通甫與盧皆死于寇明史
頌曰僞漢兵至遂陷太平月娥抗節從者九人十女之墓由是
著名

鄭堪妻

鄭堪妻石氏堪浦江鄭泳孫也洪武初李文忠薦諸朝屢遷藏
庫提點坐法死石當遣配泣曰我義門婦也可辱身以辱門乎
不食死明史

頌曰論法宜配遂以餓死義門之婦固宜有此

福清二烈

盧佳娘福清李廣妻婚甫十月廣暴卒盧慟絕復甦見廣口鼻
出惡血悉舐食之旣斂哭輒僵仆積五六日家人防懈潛入寢

室自經同縣又有游政妻倪氏殉夫亦然明史
頌曰撫呵夫尸不避臭穢夫死同殉此謂正氣

彭禾妻

滁州彭禾妻施氏正德元年禾得疾不起握手訣曰疾憊甚知必死汝無子擇婿而嫁毋守死徒自苦也施泣曰君尙不知妾乎願先君死禾固止之因取禾所歐血盡吞之以見志及禾沒

卽自經

明史

頌曰君未知妾妾能殉君吞所歐血雖臭猶芬夫歿投繯果如所云

鄧林妻

華亭鄧林妻湯慧信上海人通孝經列女傳林卒婦年二十五一女七歲鄧族利其居迫使歸家婦曰我鄧家婦何歸乎族知

不可奪其居于巨室婦泣曰我收夫骨于茲土與同存亡柰何棄之欲自盡巨室義而去之婦尋自計曰族利我財耳乃出家資盡畀族人躬績紵以給歲大水居荒野沮洳中其女適人者操舟來迎不許請暫憩舟中亦不許曰我守此六十年因巨浸以從汝父所甘心焉復何往母女方相牽未舍水至湯竟溺

死

明史

頌曰盡散家財勤苦保貞水至不避始遂初心

余佈妻

余佈妻馬氏吳縣人歸五年夫死無子家酷貧姑欲奪其志有田二畝半得粟不以與婦馬不爲動姑潛納他人聘一夕鼓吹臨門趣治妝馬入臥室自經死几上食器糠粃尙存

明史

頌曰姑欲奪志特困苦之婦不爲動終乃死之

張氏

張氏嘉定人嫁汪客之子其姑淫穢一日姑與惡少同浴呼婦提湯婦見男子驚走遂歸母家哭數日久之姑佯爲好語謝婦婦至則百端辱之惡少中有胡巖者最桀黠與姑謀遣其子入縣爲卒而巖等日夜縱飲呼婦共座不應巖從後攫其梳婦嘗且泣還之婦折梳擲地遂罷去頃之巖入犯婦大呼殺人以杵擊巖巖怒走出婦自投于地哭終夜不絕巖與姑恐事洩繫諸牀足守之明日召諸惡少二鼓共縛婦槌斧交下而死舉尸欲焚之尸重不可舉乃火其室鄰里救火者踴門入見死人驚鳴于官官鞠之得實姑與惡少等以次受刑婦死時年十九邑故有烈婦祠前三日祠旁人聞空中鼓樂聲火炎炎從祠柱中出人以爲烈婦死事之徵云

明史稿及歸
震川文集

頌曰貞婦秉志百計不移其烈可敬其死可悲

王氏

王氏名妙鳳吳縣人適吳奎姑有淫行正統中奎商于外姑與所私飲并欲污之命妙鳳取酒挈瓶不進頻促之不得已而入姑所私戲終其臂妙鳳憤拔刀斫臂不殊再斫乃絕父母欲訟之官妙鳳曰死則死耳豈有婦訟姑理也逾旬卒

明史

頌曰吁嗟妙鳳所遭何辜死亦冤矣不忍訟姑

唐氏

唐氏名貴梅貴池人適同里朱姓姑與富商私見貴梅悅之以金帛賄其姑誨婦淫者百端勿聽加箠楚勿聽繼以炮烙終不聽乃以不孝訟于官通判某受商賄拷之幾死者數矣商翼其改節復令姑保出之親黨勸婦首實婦曰若爾妾之名幸全如